

Vangadizza

*** *Luciano Rossi fu Michele* ***

Strépole e scataróni

(Stoppie del frumento e stoppie del granoturco)

Riflessioni

(trovate e pubblicate post mortem)

Circolo Noi di Vangadizza

(Cultura - Tempo libero)
www.vangadizza.org
Pro manuscripto

2015

Introduzione

A dire il vero, stendendo le modeste considerazioni che seguono, faremmo cosa certamente gradita a Luciano Rossi, se scrivessimo in dialetto, nel suo "dialèto", nella sua madrelingua, visto che questa era l'idioma, nel quale egli amava dare forma ai suoi pensieri, per trasmetterli a noi e che, in parte, stiamo leggendo...

Come accennato e come anche in altra occasione abbiamo sottolineato, ci troviamo di fronte ad una (ulteriore) raccolta di versi, che propongono, in modo discorsivo e semplice, un doppio contenuto: quello scritto – riproducente la bella parlata dialettale e, quindi, patrimonio linguistico importantissimo – avvenute, sullo sfondo, ideale e materiale, l'ambiente, in cui sono stati stesi, e quello spirituale, che, appunto, ci giunge dalla meditatissima parola rossiana.

Quella che stiamo esaminando è la trascrizione della visione del mondo di Rossi, il quale, come in effetti ci appariva ad ogni incontro, conduceva sicuramente una vita avvolta, con sua personale soddisfazione, nella considerazione della stessa, anche della sua propria vita, nell'osservazione di sé, quindi, e della sua amata gente, nonché della natura, che ci circonda, nella sua eterna bellezza.

Nelle poesie che seguono, emerge evidente il mondo, che gli stava attorno, da lui attentamente osservato, quasi, con tanto

di lente, fino a proporci quadri eccezionali, che, pur senza vederli, ci introducono nella realtà. Una realtà, talvolta, spettacolare, che solleva l'animo, che porta allegria – piante e uccelli, per esempio – ed una realtà, che è quella dell'uomo, accettata, con i suoi problemi e con i suoi quesiti senza soluzione.

Luciano, in tre, fra le poesie, che seguono, ci conferma di sapere d'essere ammalato, d'avere qualcosa che lo indebolisce – le strépole – mentre ha la forza interiore di procedere, anche di prepararsi al grande passaggio, ponendo fiducia nella speranza e nella promessa Resurrezione – e siamo alla Fede..., in Lui grandissima...

Quella fede che, senza limiti, l'ha accompagnato per tutta la vita, pur constatando gli "scataróni", che la vita stessa ha disseminato sulla sua strada terrena e che, ogni giorno, sparpagliati troviamo sulla nostra.

Da Luciano non ci resta che imparare ad accettare, con serenità, quanto ogni giornata ci propone, realizzando bontà ed amore, mentre di Lucio Martinelli, attento curatore della presente raccolta e delle precedenti, imitiamo il grande, costante impegno a professarsi indefesso amico di quel Luciano Rossi, che, sfogliando queste pagine, andremo ancora una volta ad apprezzare.

Verona - Pierantonio Braggio

Strepóle e scataróni (502)

Ciare òlte e par pochi
la vita l'è on prà molesìn .
Quasi sempre e par quasi tuti
l'è inveze on campo
de strépole e scataróni ,
dove prima de farse el calo
se se ponze tanti dì ,
e, a olte, par qualche dun ,
par tuta la vita .
In te 'sti casi se móre
senza aver fato prima
el calo a la vita .

7 ottobre 2012

Strèpole e nià (503)

No' so se le coàje 'st'ano
e le lodole le s'avia salvà .
In mèzo a le strèpole del frumento ,
adesso che l'è sta' tajà ,
adesso se vede ben
che lì l'è g'avea la so nià .
Forse la casa par tera a 'sti tempi
l'è diventà pericolosa .
E par vivere in alto, in celo ,
par ci è abitua in tera
gh'è ancora tante difficoltà .

29 giugno 2014

strèpole = stoppie del frumento

coàje = quaglie

lodole = allodole

Albari (504)

Che frequenta 'sti àlbari qua
g'ho contà 'na quindesena
de specie de osèi ,
tra merli, cincibini, stornèi ,
finchi, verdoni, tortore ,
gaze, passare, rossignói ,
capinere, gardelini ,
upupe e galeti de montagna .
E da poco gh'è anca 'na specie nova ,
mai vista prima de adesso ,
nova, s'intente, par 'sti posti qua
i lugarini i ghe dise
o almanco i m'ha dito a mi .
Nessun problema ,
nei albari del borgo
gh'è posto anca par lori .
Da un certo punto de vista
i osei i ne someja a noantri .
Forse par questo i vive in pace ,
senza barufe .

25 luglio 2014

finchi = picchi (plurale di picchio)

stornèi = storni rossignói = usignoli

lugarini = (s.m.) lucarino (l'amico di tutti)

La Grazia (505)

'Na topinara da la barba bianca
che la g'avea passa'
tuta la vita sototera
la g'ha sentio on giorno da 'na so amica
che gh'era in giro de le ciacole stranie
su l'esistenza de on altro mondo
pien de luce, aria e cielo
che l'era tentà da tempo
de visitare
“ egnaria anca mi - la g'ha risposto
la topinara da la barba bianca -
ma cossa ghe ne fao de la luce
se son senza vista ?

13 luglio 2014

A gala (506)

Un vivare che l'è diventà
un stare su 'na barca
senza più remare .
E no' l'è che no' se rema
parchè la barca la va instesso ,
no' se rema parchè
no' se g'ha oja de nare
da nessuna parte .
Forse la vita
l'è stare a gala .

18 aprile 2010

^ ^ ^ ^ ^ ^

Capire el senso (507)

No' g'ho più oja
de presentare concerti ,
recite de poesie e raconti
e de avvenimenti .
Me par de parlare tanto
senza dir gnente .
Voria prima capire el senso
de tute 'ste robe ,
e de vedarli inquadrà
nel programma incluso
de l'eternità .

20 luglio 2010

Cantare la speranza (508)

Tuti i vive ,
tuti i crede ,
tuti i spera .
Ma a cossa ghe crederli
i ragni la sera
quando se fa scuro
su tuta la tera
e i pensa de verghe
la coscienza nera ;
e a cossa ghe crederli i rossignoli
che i speta la note
par cantar d'amore
finchè i se sgola ;
e i pesci
par i quali el giorno
nol g'ha misure ciare ?
A cossa i pensa no' lo so ,
ma so che i vive
e, se i vive ,
l'è parché i crede e i spera .

9 aprile 2010

El bon esemplo (509)

A spolonare la mente
dai pensieri in più ,
che se i crescesse ,
i la trasformaria in un rojo ,
bisogna stare atenti, se podaria
privarse dei buti boni
e impitochirse la vista del del mondo .
Me ricordo de uno
che l'ha esagerà
e adesso el se cata da solo ,
senza nessun che ghe daga 'na ocià .
No' l'è bon de despetolarse
da nessuna question ,
l'ha magnà fora tuto
e el spera ne la carità .
'N'antro inveze l'ha svelà
solo i buti cativi .
Adesso tra lu e el demonio
nessuna difarenza ,
nessuna pietà par i pitochi ,
ladro, ingordo, e sempre afamà .
Da questo a quello de prima
nol pol spertarse altro che 'na scarpà .

Se se vol ch'el mondo el pirla
bisogna guardarse atorno
e, prima de spolonare ,
zercare 'na man in aiuto
da chi ha sempre dà bon esempio
de grande bontà .

15 aprile 2010

_ ^ _ ^ _ ^ _

Destini (510)

Sul più belo che g'avea deciso
de cambiare el mondo ,
no che me son malà ,
che scarogna !
Par ti o par el mondo ?
Tuti du fortunà ?

3 aprile 2010

El brusaocio sul pra' (511)

Un pra' imenso, verde
e in mezo un brusaocio zalo .
Par mi un un distintivo ,
par i paroni un pugno in un ocio .
Però el brusaocio ,
metarse in mostra ,
parlare forte ,
voler verghe resòn
fasendo l'intruso
dove al profugo i ghe spara adosso !
E pensare che un prà
de tanti colori ,
cambiando sempre ,
el saria ogni giorno
'na novità .

7 aprile 2010

El vento (512)

(parón del cielo)

Le nugole a olte le fa le bastarde
e le se mete d'acordo
de ocupare el cielo .
Le se desmentega però sempre
che esiste anca el vento
ch'el g'ha 'na spazaóra tanto potente
da muciarle tute quante
in un sciantiso in un cantòn .
D'acordo che se ne formarà ancora ,
ma el parón l'è lu ,
o mejo el servo del cielo
che ghe basta 'na ocià
e l'obedisce a bachéta .
Se podesse anca mi comandarghe
par i me pensieri !

5 agosto 2010

Fine del mondo (513)

Forse sarà un peccato ,
'na debolezza, 'na tentazion
quela de ciapare in man
la situazion .
Ghe son cascà anca mi
e j'era convinto
de far parlare el mondo
drento bone condizion .
Adesso, malà ,
me cato a la deriva
insieme con tanti
cascà anca lori ne la tentazion
de ciapare in man la situazion
e far parlare el mondo
sempre drento, ma diverse ,
bone condizion .
Forse le vere condizion
l'è de nare a la deriva ,
tuti a la perdizion .

16 marzo 2010

La beleza svania (514)

Se se zercava con entusiasmo
e se j'era felici de incontrarse .
Adesso se fa finta de no' védarse
par no' impenirse de malinconia .
Un scherzo de la beleza
che come l'è vegnù l'è na' via
e che senza pietà ,
la te lassa vivo ,
ma la t'ha zà portà via .

9 aprile 2010

La vita l'è un vizio (515)

I dotori i m'ha dito la verità .
“ Lei crede di essere vivo ,
ma per noi
è già da tempo nell'aldilà “ .
L'è proprio vera ,
no' g'avea mai pensà
a olte se se crede vivi
e s'è invezze ancora qua
solo per una specie di vizio
e, purtroppo o mejo no' so ,
mi son un gran vizià .

5 aprile 2010

La pratica de resurezion (516)

La morte, 'na bazècola ,
un ato facile e da pochi schèi ,
ma chel ghe vale
par métare in man a Dio
la nostra pratica
de resurezion .
Se gh'è tuti i documenti a posto
se risorgerà par nare in ferie
detta l'eternita
con continue escursion
in alberghi zà prenotà e pagà .
Se manca qualche documento
se risorgerà instesso ,
ma par continuare
'na vita da pitochi
pieni de dispiaceri e infermità .

26 luglio 2010

La tentazion de aréndarse (517)

Visto che no' son più bon
de credere de vérghe el controllo
de la situazion
e che tuto va avanti
come mi no' ghe fusse, mòlo tuto
e me lasso nare a la deriva ?
Forse dovaria continuare a lotare ,
ma a cossa servaria ?
D'acordo, podaria dire
d'aver fato el me dovere ,
ma no' servaria a gnente .
Eco la tentazion
del demoralizarse .
No' se pensa
che quanto se fa, se non altro ,
serve a salvar l'onore .
E questo l'è zà più che suficiente
par darse da fare ancora ,
continuamente .

10 agosto 2010

Pensieri da spolonare (518)

Spolonare, un mestiere
considerà sorpassà
- el se usava co' i salgari -,
el sarìa na' ben anca 'na olta
e el naria ben ancora
par i pensieri ,
scartarghene tanti o pochi ,
a seconda del caso
par far crescere ben
quei che resta .

15 aprile 2010

spolonare: asportare i polloni superflui di una pianta
mestiere : qui nel senso di compito da eseguire

^ ^ ^ ^ ^ ^

Rójo (519)

Robe imbròjà oncó no' ghe n'è più
e alora no' se dise più
la parola rojo.
Oncò gh'è tuto de desbrojà
tanto che par catare un rojo
bisogna farlo.

Rojo = mucchio di cose aggrovigliate, cespugli aggrovigliati.

25 aprile 2010

Pianto moderno (520)

I sentimenti 'na olta
i rivava in carozza
e se g'avea el tempo
de ciaparghe l'anda .
Adesso che i riva
come fulmini, tra copa e colo ,
no' i te lassa gnann un minuto
par capire cossa j'è .
Volea pianzare
al funerale de un amico .
“ Cossa ghèto ? Te sì mòlo ,
la m'ha dito la gente .
“ Corajo ! No' l'è gnente “ .
Le lagreme in movimento
el se j'ha portè via el vento
senza che mi
me n'avesse incorto d'aver pianto .

3 aprile 2010

Ricordi somenè (521)

I ricordi, somenè nel tempo ,
a olte pare che i sia morti ,
sebuji, stofeghè ,
da mile erbe mate ,
ma lori i resiste par ani e ani
e quando manco te pensi
i rompe la dura grosta de tera
che la li tien in presón
e i buta co' 'na forza
che l'è un mistero savere
da dove i vien .
El ricordo par esempio
de un fato d'amore
de l'antichità
e conossù in gioventù
el se ripresenta
come el fusse de ieri .
La resurezion de un amigo morto ,
le lagreme de compassion .
Più zerta gente
la zerca de scondarli
zerti ricordi
i se fa sempre più vivi .
I ricordi de alcuni
deventè tradizion
j'è 'na somenza sconta
che 'no more mai ., e ogni tanto rinasce
in qualche cor .

3 giugno 2010

i buta = germogliano

Scomiziare (522)

Zercare de migliorare el mondo
no' saria gnente .

L'è che gh'è da miglioraè tuto .

Se fusse bon

de scomiziare da mi ,

saria zà

un gran risultato .

3 dicembre 2012

^ . ^ . ^ . ^

Un motivo par vivare fin a zentani (523)

Tante de che le malatie

che par curarle tute

me tocarà campare fin a zentani

morire prima

trascurandoghene qualcheduna

me secaria .

Campando, se non altro ,

me cavarà la oja

de morire san .

16 giugno 2010

Vècio e zòto (524)

Da buteleti se guarda i vèci
par zerti lori modi de parlare ,
de sentarse, alzarse, camminare ,.
Passando par la strada
adesso un buteleteo
el s'ha messo a camminare zòto
come camino mi .

3 luglio 2010

^ ^ ^ ^ ^ ^ ^

No' so capire (525)

Continua a morire gente .
Me sa che un giorno o l'altro
me tocarà anca a mi .
L'è che no' g'ho gnanca capio
parchè se deve morire .
Par quanto me sforza
la morte no' la capisso .
Che strano
dover subirghene la sorte
senza aver capio gnente .

9 maggio 2010

“ Verba volant , exempla trahent “

(Le parole le sola, i esempi i strapéga)

A pensarghe ben co' la presunzion

se pol evitare ogni malatia .

Gnente dolzi, gelati, panetoni

e se mantien giusta la glicemia ;

gnente pòci, rosti, fritti e saladi

e resta normale el colesterolo ;

gnente cibi salè compresi i dadi

e el sangue grosso el diventa molo ;

Gnente questo e quello, cossa resta ?

Sì e no acqua e pan, e poco de questo ,

come fa i popoli senza magnare .

Mi allora ho pensà par far sempre festa

de guardare i dotori, ma anca el resto ,

a esempio la so tola par disnare .

27 novembre 2012

Zuche (526)

Più se va indrio ne le generazion
e più se se cata parenti importanti.
La vita
l'è come 'na pianta de zuche ,
che come le nasce le camina
e da l'unico cao
le buta fora dei brazi
che nando avanti i continua
a butare sempre fora altri brazi
fin a cuerzare
come 'na gran telarina un campo ,
o poco manco .
E in ogni gropo un fiore e un fruto
tuti parenti fra de lori
anca se distanti metri e metri
da la mare de partenza .
L'è cosita che anca noantri
ghemo cuerto la tera .
El problema l'è che le zuche
le ghe tien a la parentela ,
noantri gnanca 'na scianta .

8 luglio 2010

Morte totale ? (527)

Quando sparisce un ogeto ,
un atrézo, un mestiere ,
poco a la olta
sparisce anca el nome
o, s'el resta, el diventa udo
de significato .
Coss'elo par esempio
el palafreniere ,
l'arcione la guelserafa ,
el zerciario, i balzi
par ligare
le coe de formento ?
E quando a morire sarò mi
cossa saràlo dopo el me nome ?
"Ci èlo ?" i se dirà - "Coss'alo fato?".
Un nome che de mi
nol dirà pì gnente .
Solo le opere parlerà ,
se ghe n'ho fato .
Ma se parlerà de ele e no de mi .
Un nome el mio drento el quale
no' ghe sarà più gnente ,
un nome udo ,
senza significato .

28 febbraio 2011

Le rajse de la goèra (528)

Tuto el mondo diventà
‘na sola nazion.
Finalmente se pol dire
che se pol vivere in pace .
Sbaglio grosso, amizi ,
che no’ g’alaria mai credesto .
Da quel momento infati
s’ha messo a nassare qua e là
de le associazion che le punta
a on novo modelo de division .
I so aderenti sparsi in tuto el mondo
basta macare un boton
e se se raduna dove se vole
vistii da soldà .
E se combatarà ancora .
La goèra alora
no’ l’è question de raze
che vol dominare le altre ,
de popoli, de nazion
la goèra l’è ‘na question de testa .
L’unica roba alora da fare
l’è che l’omo ‘na bona olta
el se decida a dichiarare
goèra a se stesso .

5 ottobre 2013

Esodati (529)

Nel me vocabolario, el più agiornà ,
no' se cata la parola " esodati " .

" Cossa vol dire ? g'ho telefonà
a tanti, tra questi dei deputati .

Ci me dise che j'e dei " esondati " ,
gente che j'era lì lì par negarse
e sul più belo, noando come mati ,
par fortuna i ghe l'ha fata a salvarse .

Altri invezze i m'ha dito : "J'è essudati ,
dei disgraziè che da gran che i laora
j'è sempre sudè come pescegati
e instesso j'è lì par nare in malora " .

Senza idee ciare alora g'ho pensà
come salutare el primo che calo.

" Ciao - g'ho dito - sito anca ti esodà ? " .

" Grazie - el m'ha risposto un po' molegato - .

Cossa tè sipi ti no' me interessa .

Par mi so solo che i m'ha dichiarà
che esodati l'è la parola stessa
che se dise par dire malcunà " .

24 dicembre 2013

INDICE

- 4 Strépole e scataróni
- 5 Strèpole e nià
- 6 Albari
- 7 La grazia
- 8 A gala
- 8 Capire el senso
- 9 Cantare la speranza
- 10 El bon esempio
- 11 Destini
- 12 El brusaocio sul pra
- 13 El vento (parón del cielo)
- 14 Fine del mondo
- 15 La beleza svania
- 15 La vita l'è un vizio
- 16 La pratica de resurezion
- 17 La tentazion de aréndarse
- 18 Pensieri da spolonare
- 18 Rójo
- 19 Pianto Moderno
- 20 Ricordi somenè
- 21 Scomiziare
- 21 Un motivo par vivare fin a zentani
- 22 Vècio e zòto
- 22 No' so capire
- 23 Verba volant , exempla trahent
- 24 Zuche
- 25 Morte totale ?
- 26 Le rajse de la goèra
- 27 Esodati